

新纂雲南通志卷二百七日錄

名賢傳五

普洱府

清

華延譽

李春和

李萃公

趙良相

倪錦新

后作霖

永昌府

明

丁嵩

張昺

文澍

楊元

萬綸

姚方

滕檳

萬誠

吳璋

張預

張志信

戈諫

林巒

劉漢

張潤

新纂雲南通志

卷二百七 名賢傳五 目錄

張鐘

馬應祥

閃鏜

吳璋

張必煥

陳一鶴

閃繼迪

胡景

邵惟中

吳崧

王會圖

石應嵩

趙之炎

閃仲儼

戈允禮

潘嗣魁

清

徐崇岳

吳協

盛雯

周永命

劉庶埴

邵其德

李自美

趙天錫

趙端禮

李大茂

開化府

清

張學文

宋興榮

萬重箕

東川府

清

普合 李均 孟兆麟 李本厚 李重芳

湯鈺

昭通府

明

阿普

清

魏定一 辛聯璋 張錕 呂清 楊昌

孫發元 張維宗 蕭維祺 李正榮

景東直隸廳

清

新纂雲南通志

卷二百七 名賢傳五 目錄

二

羅名模 王紹恆

蒙化直隸廳

明

左伽 丁景 劉揮 朱璣 朱光霽

徐玆 馬逸

清

張芳譽 李士奇 王天佑 范悅 張問政

汪于泗 張端亮 熊兆鎰 馬參 李兆有

周文郁 姚建中 姚賀泰 徐時行 孫光祖

劉玉湛 張雲和

永北直隸廳

明

各吉八合 高策

清

高 暉 王壽昌 段永珍 陳 澤 楊鳳昌

廣西直隸州

明

楊 洲 趙鳳翔 李占春 李士龍 郭登科

何輔龍 高明

武定直隸州

明

楊堯年 楊元祐

新纂雲南通志

卷二百七 名賢傳五 目錄

三

清

安王圖

元江直隸州

清

曹一彬

白鹽井直隸提舉司

清

張輝堂 羅堯章

新纂雲南通志卷二百七

名賢傳五

普洱府

清

華延譽寧洱貢生署楚雄訓導以身爲教士皆悅服居家篤孝友父疾思魚膾時大雪走數十里外始求得進之病旋瘳性喜爲義凡賑貧乏置學田皆竭力倡始舊鹽井距郡三百里食鹽頗艱乃各處訪求不憚險阻數年得石膏等井出貲開採食鹽之便至今賴之道光十八年奉准入祀

光緒志

李春和字景明寧洱人諸生性孝友博學通經樂善不倦簡默自重生平不履公庭主鳳鳴書院講席黜華崇實垂三十餘年士之敦品

新纂雲南通志

卷二百七 名賢傳五 普洱府 清

力學者多出其門卒年八十有五

光緒志

李萃公寧洱人貢生學優品純急公好義學宮舊卑隘萃公倡議曰非所以昭誠敬也盍改作於是捐貲率衆籌經費卜吉規制煥然一新士林至今稱之

光緒志

趙良相思茅附貢飭己端方好興義舉書院舊無膏火出貲創設又以地處極邊應試寫遠士多裹足爲添設卷金赴試者咸取給焉修道路建橋樑皆竭力倡首每接見親族子弟正顏莊論諄諄以向善勉之

光緒志

倪錦新字輔臣他郎人道光甲午舉人官保山縣訓導天資樸茂孝友愷悌教授諸生循循善誘敵攻城縣令陣亡錦新獨保護府縣印與紳民完繕城垣力守數年城賴以存因勞苦致病而卒不匝月府

城即陷其一身之生死係乎城之存亡至今郡人贊頌之

採訪

后作霖字雨蒼原名炳昌字仲山思茅人幼遭離亂十歲始入塾受學家貧自勵篤志博覽年二十餘始青一衿凡九赴鄉試薦而不售一生以讀書講學爲務前後授學三十餘年多父子相繼受業者其教人循循善誘自朝自暮危坐嚴督灑掃進退規則凜然年五十八卒發引之日門下私製孝服來送葬者數百人子年幼遺稿已佚

採訪

永昌府

明

丁嵩保山人家貧事母孝自少至壯動無違禮居鄉教授從者如雲洪熙中舉懷才抱德科辭不就宣宗即位下詔求直言嵩首陳八策一曰正心術則天道應二曰重經筵則宗社福三曰開言路則聞見

新纂雲南通志

卷二百七

名賢傳五

普洱府

清

永昌府

明

一一

定四曰用賢才則政治美五曰總大綱則庶務舉六曰汰冗兵則軍儲足七曰重守令則邦本安八曰崇節儉則財用足上嘉納強起之至中道卒所著有橫峯樵唱

參萬曆志
師範演繁

張昺字德遠保山人天資清俊嗜學勵行足以表正鄉閭正統初侍郎楊寧舉爲弟子師後家日饒裕乃以千金置義田於蒲縹以濟宗族之貧者婚葬孀居皆有常給子姪有不善責令改而後已鄉人有貸而不能償者焚其券孤茆無依者則置室鞠之教以藝業長則爲之婚配凡周貧不欲人知亦不令人感有犯之者終不較有司請爲鄉飲賓竟不赴所著有鈍菴稿至今子孫繁盛人以爲積善所致云

參萬曆志
光緒志

文澍字汝霖金齒司人原籍武陵故常往來滇楚間成化丙戌進士

授南京刑部江西司主事歷郎中補四川重慶府知府以守己忤時
貴改貴州思南府都御史王守仁稱其爲人朴而理直而虛其蒞官
執而恕惠而節一時望重滇楚云萬曆志

楊元字務本保山人潛心理學終日靜默頓悟邵子先天數學有叩
之者言無不驗爲諸生遊太學歸隱居不仕甘貧樂道從學甚衆當
路重其人亟餽之無所受或封識待其去返之所著有納甲圖九圭

數學基指南行世人稱象山先生

參雍正志
師範滇繫

萬綸字允言金齒司人成化丁酉舉人任武岡州學正擢翰林院待
詔歷官長史致仕歸內外族黨之貧者咸周之年八十六遍辭親友
旬日而卒所著有西窗集妻王氏亦有月梅軒詩集萬曆志

姚方字定中永昌人有抱負隱居訓蒙言行皆歷歷可法出其門者

新纂雲南通志

卷二百七 名賢傳五 永昌府 明

三

多名士年九十七乃卒子泰字世隆舉成化四年鄉薦仕漢州學正
迎父就養備極甘旨無何引年家居畢志孝養以清白始終鄉人稱

其世德

萬曆志

滕檣字秀之金齒司人成化丁未進士歷南京戶部郎中清苦持重
以親老乞歸家居淡泊不治產業與人交平易可親非慶弔不出著
有永昌百詠歸田錄等集萬曆志

萬誠字德輿永昌人聰敏雋雅孝友純至處貧而介中成化癸卯鄉
薦再赴禮部不第卒於京邸平生俊邁修整臨財一無所苟嘗有僕
忿而自經於鄰鄰懼其訟也密懷五十金求免誠卻之遂瘞其僕鄉

人服其介量

萬曆志

吳璋字晦之金齒司人賦性剛直弘治己酉舉鄉試知湖廣平江縣

居官以清白自勵未幾致仕歸甘貧自重於勢利無所趨郡子弟多遊門下皆以禮教之惟人有過差則不能容鄉人稱其孤介萬曆志

張預字養素永昌人弘治己酉舉鄉試任衛輝府推官擢倅順天所至皆有能名尋致仕其性度剛方動必以禮為鄉評所稱萬曆志

張志信字任之志淳從弟穎敏敦淑飭名厲節孝友之實見於躬行弘治乙卯領鄉薦五試禮闈不第乃署昆明教諭貧而志篤老不倦勤為當道所器重甫四年卒於官平生所造無忝於家其所著有介

軒東籬二集萬曆志

戈諫金齒司人弘治甲子舉人正德間知巴縣廉明果斷有幹濟才興利除弊不避權貴遷太僕丞復出為湖廣僉事所至以廉幹稱會

擒巨寇賚予有加康熙志四
川巴縣志

新纂雲南通志

卷二百七 名賢傳五 永昌府 明

四

林巒字鍾秀金齒司人弘治辛酉舉人任鬱林知州廉介清苦值歲荒捐俸代貧民償逋稅以母喪歸至沙木河囊罄鄉人延為塾師資以館穀乃得歸及服闋不能治裝郡士高其誼助之行補郴州卒於

官萬曆志

劉漢字天章金齒司人自為諸生時孝友誠懇子弟及門皆有成就正德癸酉舉鄉薦任蘄水訓導再補成都啟迪諸生無問賢愚貧者捐俸給之尋署郫縣教諭聲望尤著尋卒於郫郫人祀於名宦萬曆志
光緒志

張潤字汝霖騰越人少有才望弘治中應貢北上授楚雄學訓導守己清介御諸生嚴而有恩秩滿送親還騰遂不仕居家亦有清望所

著詩集數卷藏於家萬曆志

張鐘字子鳴金齒司人正德癸酉舉人任岳州府推官摘發巨奸不

屈閣宦歷南京工部郎中以疾歸居家十五年淡泊自如及卒惟圖書數卷士林稱西邨先生萬曆志

馬應祥字元龍永昌人天性孝誠自少勵勤不事遊戲行動舉止皆有律度舉正德庚午鄉薦行業益修未仕卒萬曆志

閃鏗字大聲金齒司人磊落尚義爲諸生時人有竊其二馬者知其人不發也中正德丙子舉人任酆都知縣居家不治產業事親以孝

聞雅曆志

吳璋字廷獻騰衝衛人嘉靖乙酉舉人過浙江問學於王守仁居三年所養益粹授長壽教諭倡明理學教人以知行合一學者宗之稱執齋先生參各種舊雲南志永昌府志

按永昌府有兩吳璋一字晦之金齒司人弘治己酉舉人一字廷

新纂雲南通志

卷二百七 名賢傳五 永昌府 明

五

獻騰衝人嘉靖乙酉舉人字號籍貫科目皆不同事蹟亦異前志有誤爲一人者今爲分別而並載之

張必煥字徵文保山人嘉靖戊午舉人任江安知縣正直無私不畏強禦及歸囊無長物壽九十三卒著有存拙稿延明精舍集隸書法帖自任歸錄等書人稱爲五橋先生雍正志

陳一鶴字內庵保山人隆慶丁卯舉人居家孝友性好施與置義田以助鄉鄰設義地以埋枯骨嘗讀書光尊寺夜覺有盜入一鶴曰無他物可於牕外接之又有竊其穀者一鶴見而避之不欲識其面其

盛德類此雍正志

閃繼迪字允修保山人萬曆乙酉舉人任吏部司務天性篤孝家法嚴正生平喜獎掖人不喜人諛漕澗賊臨城建議主勦施甸激變建

議主撫皆中機宜鄉人立祠報德以子仲儼貴贈檢討賜御祭著有羽岑園秋興吳越遊草諸集

參康熙志
師範演繫

胡景保山人嘉靖丁酉舉人歷官戶部郎中屢任民牧一介不取致仕歸屏居山林有巡按造其廬見四壁蕭然几列麥粥一器因贈以米景卻之答以詩曰試向城頭高處望數家猶有未炊烟

雍正志

邵惟中永昌衛人嘉靖丁未進士歷官太僕寺卿在朝有聲告歸居閭里恂謹不敢上人有先民遺度

康熙志

吳崧永昌衛人嘉靖庚戌進士任刑部主事轉員外郎出爲福州知府禦寇有功擢四川副使陳情終養創義倉置學田賑饑恤貧鄉人

德之

康熙志

王會圖保山人萬曆癸卯舉人授鹽山知縣卓異擢貴州道監察使

新纂雲南通志

卷二百七 名賢傳五 永昌府 明

六

巡關權以直忤權璫歸

參康熙志
師範演繫

石應嵩字澹凝保山人萬曆庚戌進士授江陵知縣操持嚴毅遇事剛斷豪猾斂迹會水泛親督沙市居民障水作堤民免昏墊後調靈寶礦徒數千人入其郭應嵩登城拒之賊亦登應嵩手刃二人指揮力戰賊大奔擢南京兵部主事浦口城爲南京保障江水浸齧南城盡圯部檄應嵩董役應嵩議先築堤障江苦無石乃登高相山脈指一區掘之得石作堤七百餘丈督率甚勤初議堤之一面當糜金錢五萬厥後三面俱新之計費僅四萬餘功垂成而應嵩卒得旨贈卹

康熙志

趙之炎保山人初名千里萬曆戊午舉人歷官吏部郎中致仕歸遭流寇之亂脅以官三拒之好施濟救饑疫捐建養生院置義田義地

收贖被擄子女人皆德之

雍正志

閃仲儼字人望繼迪子天啓乙丑進士歷官少詹事禮部右侍郎與枚卜初官庶常時忤魏璫矯旨削籍莊烈帝召爲纂修日講官兩典文衡未竟其用而卒弟仲侗有孝行中天啓丁卯解元

參雍正志永昌府志

戈允禮字敬輿保山人天啓壬戌進士授麻城知縣弊絕風清邑人比之召父擢戶科給事中轉吏科彈劾不避權貴歷應天府尹工部侍郎著四書正眼知儒管見諸書

雍正志

潘嗣魁保山人事大父孀母以孝聞置義田焚借券文行兼美崇禎間行保舉法閃仲儼舉以應詔後中丙子舉人子世臣同榜解元任萍鄉知縣亦號廉慈云

雍正志

清

徐崇岳字石公保山人康熙癸卯舉人性至孝母年期頤不肯旦夕去左右每食必親調三世同炊子弟輩無私蓄吳三桂欽其名強之仕不屈嘗與人牋曰邇來頗有所願欲於匡廬台宕間人影鳥獸絕迹處化作一片冷石受日月雲烟供養豈有因果輪迴哉所爲詩文高古沈雄而自謂詩近高適因名其所著爲造適軒集

光緒雲南志

吳協字寅齋保山人乾隆壬子與兄怡同舉於鄉官四川新寧知縣以卓異調馬邊同知清廉自矢多惠政致仕歸舉鄉飲大賓絕跡公府琴書自娛修郡城奎閣培文風與鄉人處和藹恭遜一言一行均足爲鄉里矜式咸豐三年奉准入鄉賢祠

光緒志

盛雯字霽亭保山人拔貢居家孝友和易近人授徒數十年因材教育聞其風者百里外皆負笈相從以得遊其門爲幸一時科第多出

其門子毓華毓芳毓之皆登鄉舉咸豐三年奉准入鄉賢祠

光緒志

周永命保山人貢生天性孝友好學不倦康熙間授南寧教諭以培植學校敦厚風俗爲己任後以老告休捐置社倉田畝善舉甚衆著體道詩三首其一曰無時不然崔巍法體真無極君子自強原不息潔潔光光徹底清乾坤同老聖同德其二曰無處不然大道盈盈隨處逢任遊五濁亦天宮不留一物天心靜舉手拈來萬法通其三曰無事不然當身緣境照無窮酬應須歸寂照中紛曠雜來皆順則何嘗礙我主人翁臨終有詩云幾番研究記從前拾得明珠在此間秋月春花我同體不生不滅不知年又吾身有至寶發抒遍三界三界與吾身無在無不在神光常炯炯疇能認得真認真能扶持便是大清人似學二氏而有得者

永昌府志

劉庶埴字元會保山人祖廷樞本籍夾江隨其兄廷標在永昌通判任廷標與同邑永昌推官王運開殉孫可望之亂廷樞率廷標妻子走騰越後丁亥兵亂廷樞亦死之庶埴以雍正間拔貢選授浦江知縣在任十八年廉節多善政其署夾江也以運開與先人同時死難訪其孫忠灃攜歸永昌以女孫妻之令其奉祀運開墳墓以補縣生未幾卒人多慕其尙義云

永昌府志

邵其德字學明保山人工書善屬文居家孝友以廉隅自勵由乾隆己未進士選庶吉士任絳州直隸知州久旱祈雨自製青詞有願減一身祿算救茲六邑生靈之句焚詞甫畢甘霖大降絳人有饋菊花者密貯金於盆內及覺斥而返之後調保德州以病告歸初其德未第時爲學政孫見龍所知曾命撰瀾滄江武侯祠對句援筆書云山

色藹鬚眉三代來公獨抱大臣氣象見龍遽應曰江光凝几席萬里外我猶瞻名士風流至今傳誦人口云

參永昌府志
師範瀆繫

李自美字錦堂保山人家素封好施與衆安橋圯出貲重修丁巳匪陷永平倡議募勇防堵出萬金充軍費辛酉蔡匪率衆圍城禦頗懈民衆恐惶自美偕兄自儒又出萬金犒軍人心稍定當城之未陷也知府彭崧毓表其室曰金昌完人

光緒志

趙天錫保山人庠生家赤貧事父母以孝聞友于兄弟言動不苟時地方多事難民流離天錫均委曲營救略無德色里黨至今稱之趙端禮字用甫號會樓騰越人少爲諸生成同之亂奉親避難雖在轉徙之中猶與兩兄端仁端義日夜討論學業亂平舉於鄉選授大姚縣教諭不就先後掌教來鳳書院共十五年其詔弟子挈治身之

要六曰立志曰謹行曰習苦曰尚名節曰不欺曰博學舉讀書之科六曰經曰史曰性理曰輿地曰掌故曰詞章有來學者必令躬任爨汲澣濯禁服絲綢皮軟嚴曠課之戒有違必懲身率以先俾觀而化焉故弟子咸悅服成材極衆端禮之學以義理爲根本以艱苦爲砥礪以博文約禮爲準程以經世致用爲歸趣其言曰讀書之要在求益於身心也躬行勿敕而口說是騰是諛聞動衆之學也吾不取士幸得讀書有知識宜思爲天地立心爲生民立命惟無間於窮通而一以正人心維世道端風化爲己任庶無愧於儒者矣宣統元年卒年六十八著有來鳳山館詩文集切己錄譜系騰越廳志

參徐彥撰傳及
李根源撰行狀

李大茂字蔚然殿瓊子殿瓊旣死難大茂育於母黃氏孤憤崛起年十二通五經十五以鄉兵被徵隸都司龍玉珍李珍國戲下積功至

藍翎都司銜儘先補用守備大茂負邊材既出入荒徼習其阨塞形勢嘗從珍國冊封緬甸及緬甸入英吉利將畫界而天馬漢龍兩關湮沒不可得故址大茂從百餘人深入阻隘按得其地又多得木邦孟密南坎遮蘭諸地要領與其素屬行省之迹左證甚具奉圖上書總督王文韶請力爭文韶不能用初補騰越鎮中營把總稍遷至千總管帶騰越鎮右營操兵光緒末以裁缺歸大茂雖爲將家子而在軍中未嘗一日廢學尤好漢書及陸敬輿李伯紀諸家言治軍簡易而人不敢犯雖居偏校隱然爲一方重平生好賓客急患難晚歲解官遭清政不綱昆明楊振鴻欲興師騰越永昌間事敗名捕振鴻甚急大茂匿之間關走緬甸會英吉利欲通片馬片馬圖無名大吏莫知大茂子根源受大茂教擔筮爲負販者出徼外蹤跡之知其地隸

等梗土司故明茶山長官司地也事既上英人弗敢言大茂事母孝母病利下三月躬治醫藥滌廁諭母疾革撫而呼孝子者再大茂泣家人靡不泣也在籍立宗祠建鄉校贊立地方自治爲鄉祭酒年六十有一著有李氏宗譜二卷

章炳麟撰墓誌
趙藩撰神道碑

開化府

清

張學文字行先文山人嘉慶間貢生爲人清貧自守外和中介當童年時拾金不昧鄉人重之及長讀書鐘林嘗夢關壯繆教以做人之法持身愈謹歷十數年人莫能干以私年六十卒識者方之歲寒松

柏開化府志

宋興榮字晴川安平人廩生性樸訥持躬端謹不履公庭不揚人過

家貧誦讀不輟授徒以務實爲本引掖後進多所成就光緒志

萬重箕字古厓文山人貢生家貧嗜學恭默簡重雖閒居衣冠必整

俗以爲迂學使汪如洋贈以聯云居今如在古學富不妨貧後學使

顧純亦知其賢許爲篤行君子以授徒終著有古厓詩文集光緒志兼採訪

東川府

清

普合土人以廕補知府撫字有方夷人信服雍正志

李均字衡峰會澤人貢生性端謹克敦孝友家政肅然豐於財好施

與鄉里有急難者輒資之倡惜字掩骸諸會捐數千金鳩工修學宮

後興城工董役數年雖老不衰年八十餘卒光緒志

孟兆麟字玉書會澤人嘉慶癸酉拔貢性嗜學工書家庭雍藹有古

人風嘗刊敬信錄弟子規印佈鄉里不預外事惟閉戶訓子弟潛心

明理年七十終光緒志

李本厚字馨圃會澤人貢生家貧帶經而農擢永平教諭訓迪有方

屢薦卓異以老疾告歸咸豐中匪滋擾其田多被強暴侵占本厚晏

如也時人服其雅量終年七十餘光緒志

李重芳字芝軒會澤人均之孫同治庚午舉人孝友處家溫恭接物

兩試春官不第遂無意進取歸授生徒後爲地方官敦促出辦地方

公益事舉凡黌宮義倉青雲會考棚卷金等之管理及培修東城外

沙子河等善舉無不盡心竭力其父平堦任河西教諭娶妾葛氏生

三子欲回里以居宅雖容爲慮重芳聞之親赴河西迎回將已房讓

與庶母及諸弟住居光緒庚寅選平彝訓導未赴任而卒採訪

湯鈺字潤金一字式如晚號養拙居士會澤人父東旭以商起家而尊師重道聘馬龍賽佩珊教其六子皆成名鈺穎悟沈靜由拔貢中光緒乙亥科舉人禮闈報罷以父母老遂不復再試專事教授弟子日進父母歿乃就巧家永善山長之聘後官宜良教諭其教人先德行次文藝登春秋榜及馳譽膠庠者至數十百人即易業營生以他途終者至老猶述其教以教子孫邑有大事薦紳胥就裁決爭訟者得一二言而解性孝友親歿後每祭輒痛哭不食春秋必設賽先生位合祀祖堂終身無間族戚無怙恃者撫育婚嫁之貧不能學者恆免脩脯以促其成自奉儉恤人周鄉里稱爲善人云其學重實踐不矜宏博以主敬存誠之功探盡性至命之理粹益溫恭晚益滋泰書法端重數十年無一率筆著有性道語錄若干卷易象說明若干卷

古文若干卷

採訪

昭通府

明

阿普土人元末任總管洪武中率衆歸附招隣酋效順授知府

雍正志

清

魏定一恩安人乾隆壬子舉人性嗜學品高行潔不圖進取以事親課徒爲樂歷主昭通威寧書院講席及門多篤行士歲入束脩分給族人所居松竹草堂總督伊里布巡邊曾造廬訪談題其額曰五柳遺風著有詩賦文藝數十卷燬於兵舉鄉飲大賓終年九十餘

光緒志

辛聯璋字朗山恩安人道光丙戌進士選庶吉士散館改浙江遂安知縣以不合時趨引疾歸主講昭通東川書院二十餘年學宗程朱

課士以躬行實踐爲本故門下多篤行之士不僅以文章科名顯也
爲人純粹士林奉爲楷模一言一行鄉里咸引重焉卒年七十訪採

張錕原名永錕鎮雄人河陽訓導煜孫道光壬辰舉人選白鹽井訓
導賦性端方篤孝友兄弟八人父師培教之嚴少觸即杖策從事錕
委曲解慰悉得歡心母老多疾日侍湯藥家故貧竭力甘旨不使父
母知有艱窘狀母卒廬墓三年父卒亦如之兩兄早歿撫姪教之成
立鄉鄰絕跡公門與戚里遊無戲語無慢容里有爭鬪婉言解勸無
不忻服州城地苦卑下每霖雨街市成河乃相地勢濬渠數百丈行
者便焉學宮桂香閣向建城外規模湫隘錕竭力經營移建城中積
累數百節俸償之官訓導十三年常摘經史中之切於身心者錄示
諸生教之以身體力行有貧而勤學者時爲資助咸豐九年杜軍襲

井團集鄉勇保衛學宮兵潰爲敵所得罵敵被戕光緒元年奉准入

祀鄉賢祠

光緒志

呂清字靜齋恩安人性溫厚品端學邃嗜古能文道光丁酉以第二
人舉於鄉挑選教諭擢東川教授多所裁成主鳳池西林書院講席
啓迪有方先德行而後文藝學優品純者多出其門而掇巍科登黃
甲者尤絡繹不絕凡事之關人心風化者靡不匡正維持年七十餘
終士林愛戴共泐石以彰其德教光緒志

楊昌魯甸人昭通府學歲貢品端學茂善氣迎人其在家雖對妻孥
皆正襟危坐未嘗跛倚年過六旬猶閉戶讀書手不釋卷所交皆端
人正士二三知己外雖同儕亦難覩其面戒子勿出入衙署非公事
延請足跡不履公門一言一動允爲鄉里矜式子嗣洪道光己酉拔

貢光緒志

孫發元字慧菴大關人同治庚午舉人屢長關陽書院循循善誘造就者衆人以其敬重之卒年八十有奇弟啟昌字克菴光緒丙子舉人和易寡言制行不苟主講關陽書院教人以器識爲先成就亦多卒年六十有四探訪

張維宗字海樓大關人幼敦敏事親以孝謹聞光緒壬午舉於鄉長關陽書院教人以敦品爲先多所造就選授江川縣教諭以行誼矜式士林卒年八旬其門人鄧紹周羅瑞霖爲立德教碑探訪

蕭維祺字錫之恩安人歲貢生淹通經訓旁及子史靡不兼綜條貫爲文根柢經術不苟爲炳炳琅琅教弟子文行並重主講郡育賢書院及門千餘人掇巍科敦躬行者甚衆維祺善誘不倦數十年如一

新纂雲南通志

卷二百七 名賢傳五 昭通府 清

一四

日或比之宋胡瑗之教授湖州云光緒二十八年卒年六十二子瑞

麟亦有名於時謝崇基撰德教碑

李正榮字耀廷昭通人生有至性夙抱大志初罹亂祖父俱歿母矢志撫孤兄弟七人正榮居長餘皆幼弱賴其貿易撫持漸習弓馬入武庠從軍保都司改文職知縣改捐郎中生平饒有經濟才自經商重慶才猷大展列肆徧東南家至巨富鄉人之往依者甚衆事母極孝癸巳母在昭病危榮在渝聞電星馳至昭數日母始歿人以爲孝思所感後聞有談及母節者輒兩泣不止友于兄弟至老彌篤獨力建宗祠設祭田置家塾尤好施與凡賑荒修橋及各慈善事美不勝書光緒癸卯滇撫林紹年具其孝友義行奏請旌揚部准建坊立祠卒年七十餘葬重慶探訪

景東直隸廳

清

羅名模字範文本姓程幼聰穎讀書五遍即成誦未弱冠補諸生夙有疝疾不問家人生產娶李氏見其明決克任門戶即勅斷家事絕意功名不應鄉試日惟依依父母前不離跬步性儉常欲市一水韉不果獨於晨昏肴饌必求豐腆不少吝曾與兄師事同郡何之杼終身禮之無倦色事兄若嚴父頗資脩脯以助家用遇貧乏則不受其金以紙筆助之以故門人益進至其教人雖盛暑必具衣冠晚嗜醫學手錄方書一十六卷居常自歉無補於世將藉活人術以行素志云以子含章貴贈如其官

景東廳志

王紹恆景東舉人高簡嚴重文行有聲居鄉課徒以實行常排解忿

新纂雲南通志

卷二百七

名賢傳五

景東直隸廳

清

一五

蒙化直隸廳

明

爭人皆悅服丙辰杜軍竄擾同知鄭自耀率衆禦之軍覆紹恆激勵鄉勇要敵於險相持不戰敵乏糧使來說曰欲得經宿糧假道東出楚雄耳此外秋毫無犯也紹恆奮然曰若戕吾輩長官是吾讎爲子弟者尙爲之具食飲乎斬使誓衆先發書於龍鳳二川簡精銳伏於哀牢山左絕其歸路尋潛師夜起襲之奮擊三日敵不支宵潰追至哀牢山伏起來擊死傷略盡遠近聞之稱快焉

光緒志

蒙化直隸廳

明

左伽蒙舍人永樂中襲知州從後征麓川戰於大侯功第一擢臨安

知府仍掌州事正統間升州爲府遂以伽爲知府

雍正志

丁景字德輝成化戊戌進士歷官兵部郎中出爲石阡知府先是苗

叛學宮府治俱毀景以次修復賑窮恤士收輯流亡多有善政卒官囊橐蕭然惟遺稿數卷而已所著曰公餘清詠萬曆志

劉揮字本忠一字守一蒙化人學問淵懿以歲貢任雅州學正初迷渡人未知學揮築館授徒竝爲講明冠婚喪祭之禮風俗一變參道光志

朱璣字文瑞蒙化人成化丁未進士少爲衛卒所辱始奮志力學及登第卒懼復璣致謝曰非公予何以至此方以爲德敢以爲怨乎終不憾初授大理寺評事尋遷寺副轉寺正讞獄無冤後出四川按察使僉事陞貴州按察副使持憲肅法時王守仁謫龍場驛璣遣子從學聲氣相洽尋乞歸優游林下者十年始卒其致政時守仁寄以詩云百事支離力不禁一官棲息病相尋江湖魏闕星辰迴松竹茅茨歲月深欲擬黃精消白髮由來空谷有遺音曲肱已醒浮雲夢荷蕢

休疑擊磬心

參光緒雲南志及蒙化志

朱光霽字克明璣之子從父宦游師王守仁受良知之學正德癸酉舉於鄉官重慶府通判遷知綿州再遷西安府同知所至以廉明稱爲人慷慨有大節乞歸後家徒壁立新都楊慎雅重之與大理李元陽往復究性命之學纂修蒙化府志其自太學南歸也守仁贈以序云朱光霽克明廉憲朱公之子也嘗與其兄光弼從學於予舉於鄉來遊太學已而歸省請學之要予曰君子之學以變化其氣質其未學也粗暴者也貪鄙者也虛誕者也矜誇者也輕躁者也及其既學粗暴者變而爲溫良貪鄙者變而爲廉介虛誕者變而爲忠信矜誇者變而爲謙默輕躁者變而爲重厚夫然後謂之學其未學也猶夫人也及其既學亦猶夫人也則亦奚貴乎學矣子其勉夫光霽曰敢

問何以知其氣質之偏而去之予曰手足之疾痛耳目之瞶昏無弗自知也氣質之偏獨假於人乎弗思耳固有隱淪於臟腑潛汨於膏肓而不能自知者非有名醫爲之切脈觀色酌之以良劑蔑有濟矣曰弗能自知也乎弗思耳吾語子以劑溫良者粗暴之劑也能溫良則變其粗暴矣廉介者貪鄙之劑也能廉介則變其貪鄙矣忠信者虛誕之劑也能忠信則變其虛誕矣謙默者矜誇之劑也能謙默則變其矜誇矣重厚者輕躁之劑也能重厚則變其輕躁矣醫之言曰急則治其標緩則治其本凡吾之言猶治其標本者也若夫科第之舉文藝之美子之兄弟亦餘才也吾故不屑爲二子道也吾所言五病雖亦一時泛舉然今之學者能免於是亦鮮矣道經湖貴從吾遊者多或有相見其亦出此致勉勵之意云

蒙化縣志

徐玳字仲器蒙化人正德癸酉鄉薦沈潛重厚用心於內少時彭提學甚愛之與雷柱史齊名廉訪張公恕聘以教子持正不干學益進及門者多所成就

萬曆志

馬逸字廷泉蒙化人萬曆辛卯舉人精周易從學者自遠方來時順寧猛廷瑞構亂大師進勦逸募義勇數百人親率隨征招撫全活者甚衆當事上其功欲授世職辭不受優遊林下教子孫周濟貧乏不遺餘力子易從萬曆己酉鄉試第一名從亦同榜舉人均才優學裕能以文學世其家

參光緒雲南志及蒙化志

清

張芳譽蒙化人順治間貢生居心仁厚樂善好施力行不倦年逾七十猶手錄格言傳播遠邇雖嚴冬酷暑誦讀不輟士民公舉德行年

八十卒子錦蘊字允懷歲貢生學問賅洽先是明末兵燹書籍散亡錦蘊纂四書講義以教後學官景東訓導康熙辛未與修滇志所著有墨芸草壽世準繩諸書

參雍正志
蒙化縣志

李士奇字淡從蒙化人貢生事繼母孝有學行康熙癸丑吳三桂反脅之以官不受操守堅確至老弗移

參雍正志
蒙化縣志

王天佑蒙化人庠生天性孝友恂恂雅飭士民公舉入祀鄉賢祠

道光志

范悅字忻侯蒙化人性純孝母歿廬於墓康熙間吳三桂反脅以官不就時僞鎮黃某欲乘機劫城人恐甚悅密謀胡丞請會左土職募勇士集鄉兵爲彈壓計胡疑左悅以全家保之復質且二子黃抵蒙知有備遂引去悅後隱居授徒終其身不復仕進子逢溶尤樂善不

倦云

蒙化縣志

張問政字一如蒙化人晚年號景陽外史康熙乙酉舉人慷慨有才略剛方正直博學聞鄉里嘗謂讀書當求實用雍正四年滇省丁歸於糧蒙化田賦公件銀每石定九錢爲額鄉人恐後加增爲民累赴省歷訴不省將復往時問政爲選人束裝北上止之曰錢糧乃國家正供大府不予所請必內格部議外有碍於赴輸俟吾面叩天閣經制方能畫一耳聞者皆誕之當是時世宗勵精圖治鉅細躬親舉人得官廷試奏摺一問政備將滇糧加增始末繕入摺王大臣閱其卷駭然奏之上因召問政午門面訊政侃侃直陳氣不少懾上溫言慰勞准查明減其數後十八日上御午門召問政復慰之曰爾言無欺足見忠直但此案前已准雲南巡撫奏飭戶部改如河陽例六錢起科爲蒙化定制又以其性贛不宜於上官著授教職問政對曰邑宰

教官均為朝廷盡職上悅遂以景東教授回滇在任多年訓課有法歸田後尤謹抑自持積書滿架閉戶研究之年八十餘始卒

蒙化縣志

汪于泗舊定邊縣人諸生幼孤育於祖母比長事祖母以孝聞弟早逝婚嫁遺孤如己子女教授生徒負笈者衆己亥夷賊倡亂捐家財率士民拒之為賊所傷羣丐感其恩力救得免首倡建學不惜己貲

鄉人矜式

參蒙化縣志
楚雄府志

張端亮字寅揆蒙化人康熙己酉舉人吳三桂反從父隱居力卻偽召事平歷任臨安順寧教授擢濉縣知縣潔己愛民虛橐以歸多所吟咏工書畫年九十五卒

續蒙化縣志

熊兆鑑字愛鼎蒙化人康熙己酉舉人有學行吳三桂聞其才名強之仕不屈事平授鶴慶府教授勤於考課與修通志後擢靈邱知縣

新纂雲南通志

卷二百七 名賢傳五 蒙化直隸廳 清

一九

所著有自箴集環篆仙稿

雍正志

馬參蒙化人康熙己酉舉人吳三桂反脅以官不受事平授巴陵知

縣

雍正志

李兆有蒙化人康熙壬子舉人吳三桂反欲官之力辭事平任趙州學正端厚周慎不愧師範士論重之

雍正志

周文郁蒙化人貢生性嚴介家範整肅學邃品端歷任保山廣通訓導訓誨生徒均以砥礪廉隅為要從遊頗衆平居敦宗睦族賑饑撫孤贍濟貧困助婚喪貲尤慷慨不吝焉

光緒志

姚建中字極傳蒙化人幼穎異好學既長尤敦品行由明經官祿豐司訓以白鹿洞學規作範士風不變時學宮傾圮建中捐俸倡修邑紳翕然踰年落成年七十予告歸里復修葺蒙化大成殿北社學文

獻樓并建議設送米所公德南薰永春諸橋之成也建中皆傾囊助之子志德志仁志和於諸善舉亦力行不倦云

蒙化縣志

姚賀泰字慶年一字吉庵蒙化人性誠孝勵志讀書務見實行不好爲詩古文辭謂多言不若禔躬而實也以乾隆壬申舉於鄉丙戌挑分河南署桐柏令旋授鎮平所至以廉能著後丁艱歸不復出居鄉好行善事拓宗祠置義田常訓其子曰是亦爲政予所讀書如是而已與徐時行續修郡志

蒙化縣志

徐時行字用之蒙化人天性穎異過目成誦乾隆乙酉丙戌鄉會聯捷任直隸井陘知縣以內艱旋里服闋復請終父養居鄉恂謹自持不干外事與人必盡其誠雖少年新進懼有以傷之近之者羣推其

樂易與姚賀泰續修郡志

蒙化縣志

孫光祖字惟中號陶菴蒙化人天性純孝持身誠篤與人無欺雖賦質遲鈍而力學不倦年四十二中乾隆壬午科鄉試是後愈醇慤自矢不苟喜笑肆力五經四子之學卓然有得辛丑成進士年六十一矣授澂江府教授卒於官囊橐蕭然祇遺書數卷云

蒙化縣志

劉玉湛字露亭一子輝山蒙化人少孤性純孝爲諸生設帳教授以養母弟子從遊者常百數鄉舉明經嘉慶中擢進士第補刑部主事選充提牢廳尤盡心獄訟多所平反遷戶部倉場監督轉刑部員外郎獄囚餽金求脫羈縲玉湛卻之曰天下豈有受金劉輝山哉上察其廉將擢爲御史未及拜而卒年五十五始玉湛爲諸生時讀書覺派庵中寺僧坐累且逮下獄因爲書請於邑令事獲已僧昏夜叩門請納金以爲壽玉湛怒厲聲詔之去其剛鯁不可以私干謁殆得之

天性云王貽桂撰傳

張雲和字琴軒蒙化人性廉正有學行咸豐壬子舉人丁巳城陷雲和墜城出匿永昌潞江壩為土司教讀年餘潛歸隱居授徒敵屢欲予以偽職均婉辭卻之同治己巳王鍾祥規蒙化不克師潰雲和乘間遁入省尋赴禮部試不第選阿迷州學正遷麗江府教授歸田後主學古文華兩書院講席立身謹飭取與不苟著有鴻嗽小草其詩長於言理又舉人之不受偽職者有黃龍符王際泰鄭鴻圖蒙化縣志

永北直隸廳

明

各吉八合永寧人父卜各吉仕元為土官洪武中領兵歸附授土知州子各吉八合嗣永樂初率香羅革甸瓦魯之刺次和四部番人入

新纂雲南通志

卷二百七

名賢傳五

永北直隸廳

明

一一一

朝升永寧為府授各吉八合為知府賜鎔金花帶鐫四字曰克篤忠

誠參一統志雍正雲南志

高策北勝州土司之裔洪武十四年平雲南策甫七歲率所部首先歸附後二年入覲送國子監讀書及長遣使送回蒞任之日即禁止通把勿置田宅以侵漁夷民邊境以安其孫昶征麓川有功萬曆志永北府志

清

高暉恩貢生沈潛理學寡言笑母失明幾二十年朝夕扶持未嘗少懈居喪三年足不入私室雍正元年公舉孝廉方正堅辭而止乾隆元年復舉之辭愈力署知府江嶠孫素聞其賢歎曰此真孝廉也以案册存府以示不愧所舉云永北府志

王壽昌字介圖號眉仙又號養齋永北人幼失父母育於祖母吳氏

及叔父元士事祖母務得其歡事叔父母如父母祖母卒哀毀逾成人嘉慶癸酉舉於鄉官尋甸訓導與諸生講明爲學要道作訓士腐言以教之采訪節孝之無力舉報者爲刊名節孝祠以章風化及卒門人聚哭具棺以殮壽昌生而穎異讀書過目不忘每夜讀未嘗就枕席叔呵禁之乃睡懸石於樑繫以香香過石落擊物有聲即警起復誦平居寡言笑及其訓諸生則終日無倦其難如此初壽昌居京師館鎮國公家有以千金請託者壽昌厭苦之署聯於門曰惟有著書消永日更無閒事擾東君後改館慶郡王府宣宗召見王乘間言壽昌羈旅績學狀上曰壽昌可是王引之子對曰先王師傅乃雲南人上曰是一正經念書人然卒不達所著有淺言六卷大學實踐全功述十八卷體驗中得來語一卷韻學珠璣舊志作韻府探珠四書類典古今珍

奇志續物類相感志詩詞一百首金碧箋集題橋集靈秀小史杏花

園傳奇春雪新聲填詞四種小清華園詩譚二卷唱和集松月延年

室消寒雜興

參新舊志及永北採訪

段永珍字傳巖永北人道光己酉拔貢嗜學工書主壺山書院講席

癸丑勦理城工丙辰協辦團防頗形勞瘁鄉里德之

光緒志

陳澤字春巖永北人道光丁酉拔貢家貧課徒供甘旨尤敦友愛言

行皆可則效主壺山書院講席所甄陶多端士鄉里矜式焉

光緒志

楊鳳昌永北人性清潔持身嚴正篤信宋儒之學一以陸稼書爲宗

咸豐癸丑有司委鳩城工又督修覺斯樓先農社稷山川各壇頗著

勤勞丙辰匪亂總理團防設屯立礮均協機宜鄉里賴以保全及卒

遠近聞之無不悼惜著有四禮採輯四卷知陋軒迂談一卷文集一

卷旅憤吟詩草一卷

光緒志
兼採訪

廣西直隸州

明

楊洲廣西州人正德癸酉舉人任國子監助教擢四川保寧府推官
有循卓聲居鄉尤能化俗萬曆志

趙鳳翔廣西州人幼穎異好學及長善事繼母人無間言由歲貢任
資縣教諭講明經學諸生多受其益攝縣事清正廉明及遇寇警保
固城池嘉靖間入名宦康熙志

李占春字載陽廣西州人幼孤事兄伯春如父撫姪無異己出居鄉
以仁厚稱由歲貢任香山訓導納一妾年尚少占春曰此吾女輩不
可犯也贈金遣之遷仁化教諭建尊經閣疏泮池以德化諸生又時

新纂雲南通志

卷二百七

名賢傳五

廣西直隸州

明

一三三

濟其貧乏者崇禎間祀名宦

康熙志

李士龍字化之廣西州人事後母孝復讓產與弟為人端方正直好
學能文一時諸生半出其門以歲貢官上海主簿疏治河渠有成績
民立慕禹堂肖像以祀海盜掠大姓捕獲訊治剖決明敏攝縣事尤
稱清介士民德之比歸行李蕭然康熙志

郭登科廣西州人歲貢生家貧而介刻苦好學歷曲靖大理教授捐
俸修學給助寒士宦歸行李蕭然買僕五人義釋之不取值訓子弟
化鄉族至耄手不釋卷普名聲反賄以金帛力卻之廣西府志

何輔龍字傅巖師宗人少孤力學事兄友謹兄疾親嘗湯藥寢不解
帶者累月鄰里稱歎嘉慶初黔苗為變侵近邑境輔龍與其兄募鄉
勇助官軍拒守事平守令叙功輔龍辭不受歸鄉教授選拔貢生再

試秋闈不中益屏棄時文獨慕古聖賢修齊治平之學大篤志於經史百氏尤好讀宋程朱氏書未嘗一日去諸口其教弟子以致知格物力行忠信戒鶩華競思與一鄉之士皆為孔孟之徒曠然以誘民化俗為己任親教二子皆通貴教誨督以義方未嘗寬假所得俸養多所施給與兄嫂共居有無相通室無私貯長子渭珍官武昌府同知具舟迎輔龍就養官舍遂以疾卒年七十歸葬於滇所著書有六松山房詩文稿藏於家次子桂珍自有傳林則徐撰神道碑

廣西府志

武定直隸州

新纂雲南通志

卷二百七

名賢傳五

廣西直隸州

清

一四

武定直隸州

明

明

楊堯年和曲人嘉靖以前郡未設學堯年發憤讀書寄學大理歸教鄉里人皆知學武定人文自堯年起之參一統志康熙志

楊元祐和曲人春震子以副榜任趙州學正端方醇謹博通典故工詩古文詞孫可望據滇迫之以官力拒不受士論賢之子澤先有品學嘗著明善六述為時所重參雍正志檀萃農部瑣錄

清

安王圖元謀人貢生行己端方衆所推服遭明季之亂兵火荒涼瘴毒尤甚所委邑宰無肯至者於是邑人無所依共推王圖行縣事王圖亦不辭時孫可望以其黨賀九儀守武定外逼於寇內則張和尚等讎殺無已土賊四起王圖招集流亡開墾荒蕪捍禦寇盜民賴以

安如是者三年順治十六年開滇叙王圖保障鄉里功以爲石屏州學正歷著聲譽卒於官

檀萃華
竹新編

元江直隸州

清

曹一彬新平人康熙乙巳土酋祿益反圍新平執一彬令誘開城一彬入率民兵固守賊攻之不克城遂獲全

康熙志

白鹽井直隸提舉司

清

張輝堂白井人道光間恩貢性純樸薄華侈通經史從遊者衆任昆陽州訓導歷任刺史慕其器學屢聘主講巨橋書院勤於訓迪以德行文章相勗官民咸敬服之年七十有九致仕歸著有藕塘雜詠四

新纂雲南通志

卷二百七 名賢傳五 元江直隸州 清

一一五

白鹽井直隸提舉司 清

卷課躬文稿八卷

採訪

羅堯章字昭平白井人憲章之弟諸生性孝友幼失怙孀母有痺痿疾侍奉刻不稍離長而明敏臨事能斷人有患難輒委曲排解有俠士之風咸豐六年亂作流寇以白井富饒欲資以起事暗糾數百人由東南各關突放銃礮呼聲鼎沸堯章見勢危迫著短衣持銃礮號召鄉勇先率之出東關迎敵匪首蕭某揮戈而進堯章燃礮擊之洞胸立斃堯章驅衆追殺他關之匪亦皆潰散九年夏夷匪石馬將陷井禡訓導張錕衣剗其腓民皆驚匿堯章奔救馬將怒顧其下殺之夷衆夙欽堯章品望掖之退遂擁錕至五馬橋裂屍懸柱上無敢取之者堯章約趙士鼇等釀銀贖錕首聚屍厚殮之厝於羅氏祖塋匿其妻子於家事平遣人護送回籍其他施粥施棺施寒衣等義舉甚

多善化愚頑感悟者衆人皆以義士目之會滇西敵勢日熾擬平敵
要務數十條上之大吏重其才保舉訓導留省差委堯章憤其言不
用告歸避地東鄉不肯蓄髮有舊識爲僞官者屢以遊詞相誘力斥
之後聞官兵屢敗省城被圍終夜啼噓竟以憂憤卒

採訪